

tici (1). Dionysius Richelius (2) post dona Spiritus sancti tres adhuc causas contemplationis enumerat: servidum scilicet amorem Dei, abstractionem mentis ab omni operatione circā res cœtatas, et conatum mentis ad extensionem, ac defectionem suam in Deo. Et amor quidem admirabili circulo causa simul est et effectus contemplationis, ut suprā in ejus definitione notatum est. Abstractio autem pertinet ad præparationem ipsius, ut idem Dionysius alibi (3) scribit. Quod verò de conatu dicit, prudenter intelligendum est: nam contemplatio donum Dei est, quæ neque industria nostrâ, neque labore comparari potest; quia tamen dispositivè (ut aiunt) nos circā eam aliquid agimus, ad hoc applicare conatum nostrum debemus, ut præviis dispositionibus ad eam præparemur; abnegatione nimurum, mortificatione, puritate vitæ, meditatione, iugi præsentia Dei, et exercitio Aspirationum. *Status enim divinus*, teste Hesychio (4), *nascitur in animo nostro, ex continuâ Dei memoriâ, et assiduâ ejus invocatione*. Per vitam verò practicam, sive activam, ut ait Olympiodorus (5), quæ est veluti prævia introductio ad theoricam, pervenimus ad contemplandam divinarum rerum sublimitatem. Ut enim tutum non est cum ueste nalare, ita nec cum passione aliquâ Theologiam attingere, ut sapienter Climacus (6) scribit. His

(1) Agunt de donis Spiritus sancti Rusbrochius in regno Deum amantium. Harphius lib. 3. p. 1. c. 10. et 11. Massut. de cœl. conv. 1. 4. Alvarez to. 3. l. 5. p. 2. c. 4. Ponte in Duce spirit. tract. 2. c. 3. § 1. Bonav. in tr. de ipsis. — (2) Dionys. Cartus. tr. de contemplatione. — (3) Idem de fonte lucis. c. 9. inf. — (4) Hesichius Centur. 1. c. 96. — (5) Olympiodor. in eccl. c. 7. v. 12. — (6) Joan. Climacus gr. 27.

igitur præparationibus rite præmissis, ad fores divinæ sapientiæ cum magnâ longanimitate et constantiâ pulsare oportet quoisque ad contemplationem ipsius, ipsâ auspice, introducamur; ac tandem ad arcanum cum Deo unionem elevemur, quæ est finis contemplationis, et hujus mortalîs vitæ suprema beatitudo.

## CAPUT X.

INDICANTUR AUCTORES, QUI DE CONTEMPLATIONE SCRIPSE-RUNT. QUOTUPLEX EA SIT. QUI EJUS GRADUS ET STA-TUS? EXEMPLA DIVINÆ PROBATIONIS, ET PATIENTIÆ IN DESOLATIONE. DIVISIO ANIMÆ, ET POTENTIARUM EJUS SECUNDUM MYSTICOS. HYMNUS AD DEUM.

1. Quæ de contemplatione dicenda forent, paucis verbis perstringo. Quid enim opus pluribus? Patent fontes. Omnes Mysticæ Scriptores, et qui de eâ ex professo agunt, Richardus Victorinus libris quinque, Dionysius Carthusianus libris tribus, et aliis opus-culis, Jacobus Alvarez libro quinto tertii tomî de viâ spirituali, Ludovicus à Ponte in suo Duce spirituali, et optimè libris sex Thomas à Jesu; quibus addo eximiam Christi Heroinam S. Teresiam. Ad his petenda quæ hic desunt. Quod si aliquis cupit Mysticorum effata scholastico rigore examinare, Franciscum Suarez consulat, in utrâque Theologiâ versatissi-mum, libro secundo de oratione; et Maximilianum Sandæum in sua Mystica Theologia, et in ejusdem Clavi sive Onomastico.

2. Inter Ethnicos sapientes plures fuisse divino-

rum contemplationi intentos , ex scriptis Platonico-  
rum liquet , et ex historiis. Sed, ut notat Albertus  
verè Magnus (1), illorum contemplatio ob contem-  
plantium perfectionem erat, et ideo extrà intellectum  
minimè procedebat, cuius solius illustratione posse  
se ad unionem cum summo bono pervenire neglecta  
cura voluntatis, falsò existimabant. Nostra verò  
propter amorem Dei est, et idcirò ab intellectu  
transit ad affectum per amorem. Hæc dividitur in  
acquisitam et infusam. Acquisitam voco, quam pro-  
pria industria et exercitatione, sed non sine divina  
cooperatione et gratia, acquirimus. Infusam, quæ  
ex sola gratia sive inspiratione divina promanat.  
Illa ab habitu fidei , aliisque virtutibus Theologicis  
et moralibus procedit : hæc à dono Spiritus sancti.  
Illa longa, et difficilis : hæc facilis, prompta, et su-  
avis. Illa ratiocinativa dicitur, ista experimentalis.  
Qui primam habent , optimè de ea , ejusque regulis  
discurrunt, experientia destituti : qui secundam,  
minus periti in sermone sunt, sed in usu et expe-  
rientiali excellentissimi.

Dividitur hæc etiam in puram et mixtam. Mixta  
nuncupatur, quando intellectus contemplans ab  
operatione phantasie dependet. Pura , cùm sine  
interventu phantasmatum exercetur. Hæc difficilis  
est, et admodum rara, et communiter à Scholasti-  
cis negatur; admittitur tamen à Sanctis et Mysticis  
Scriptoribus , ut diffusissimè probant Sandæus (2)  
et Thomas à Jesu (3).

(1) Albert. Magn. lib. de adhærendo Deo c. 1. — (2) Sandæus  
Theolog. myst. l. 1. comm. 12. — (3) Thomas à Jesu de Con-  
templi. lib. 5. c. 1. et seqq.

Alia divisio est in affirmativam et negativam. Ap-  
probant hanc duplēcēm viam Deum contemplandi  
plerique veterum (1), et Scholastici (2) docentes  
alia nomina dici de Deo negativè , alia affirmativè .  
Cùm enim Deus sit infinitus , illi attribuimus quid-  
quid perfectionis reperitur in creaturis , sed quia  
creatis perfectionibus aliqua semper adhæret im-  
perfectio, hanc removentes in Dei notitiam per ne-  
gationes assurgimus. Uterque hic modus aptè ex-  
plicatur dupli symbolo, pictoris et sculptoris. Qui  
enim imaginem pingit, eam in tabula multorum co-  
lorum adjectione delineat : qui sculptus , segmenta  
marmoris aut ligni paulatim demit, donec simula-  
crum perfectum reddat. Sic cùm asserimus , Deum  
esse sapientem, bonum, potentem, justum, miseri-  
cordem ; perfectiones ei creaturarum, velut colores  
iconi, adjicimus. Cùm verò dicimus Deum non esse  
ens, neque vitam, neque sapientiam, neque poten-  
tiam , neque aliquid cæterorum , eo scilicet modo ,  
quo à nobis concipiuntur, quasi statuam dedolamus:  
et hoc est Deum per nescientiam scire, ut S. Maxi-  
mus observat (3), quod est proprium Mysticæ Theo-  
logiæ. Utitur prædicta similitudine S. Dionysius (4)  
cui aliam non dissimilem corporis vestiti et spoliati  
affert Maximus Tyrius (5) philosophus Platonicus.

Rursum dividitur contemplatio in claram , et ca-  
liginosam. Clara est Beatorum in patriâ. Caliginosa

(1) Dionys. Basil. Magn. Joan. Cyparissiot. August. Bonav.  
et alii relati à Sandæo lib. cit. comment. 11. — (2) Scholastici.  
1. p. qu. 13. et ubi agunt de attributis in genere. — (3) S.  
Maximus in c. 3. myst. Theolog. — (4) Dionysius ib. — (5) Maxi-  
mus Tyrius ser. 1.

Viatorum, quæ sublimior est, quam contemplatio pura, et ab eâ differt per majorem approximatiōnem ad divinam unionem (1). Caligo autem divina, ut scribit primus Mysticorum magister (2), est lumen incessabile, in quo Deus habitare dicitur, quod nec cerni potest propter excellentem claritatem, et inaccessibile est ob excedentem supersubstantialis lucis effusionem. Quare hæc contemplatio nihil aliud esse videtur, quam defixio mentis in hujusmodi lumine intelligentiae oculum reverberantem, et suā immensitate seipsum abscondentem.

Alia denique est contemplatio supereminens, altior quam caliginosa, in quā Deus, non per dona Spiritus sancti, sed per se solus rapit, ac elevat mentem ad divina, que sic elevata Deum attingit, et non per ænigmata similitudinum corporalium, sed altiori, atque ineffabili modo. Talem fuisse existimo Sanctissimi Patris nostri Benedicti raptum (3), quando extrà mundum elevatus, quasi sub uno Solis radio universum mundum collectum conspexit. Disserunt de hac profundissimè Thomas à Jesu (4), et latè Sandæus (5), alque hanc existimo elegantissimè describi ab Augustino libro nono suarum Confessionum, in colloquio habito cum Matre de Regno cœlorum.

3. Plures itaque, et diversi sunt gradus contemplationis, quamvis ipsa una sit, nec facile possunt certo numero comprehendendi. Multis enim modis animæ contemplanti se communicat Deus, et sp̄ritus ejus ubi vult spirat, et quando vult, et quomodo

(1) Th. à Jesu de Contempl. 1. 5. c. 4. — (2) Dionys. epist. 5. ad Dorotheum. — (3) Greg. 2. Dialog. c. 35. — (4) Th. à Jesu de contemp. 6. — (5) Sandæus myst. Th. I. 1. com. 14.

vult. Et quis poterit sensum ejus assequi, aut quis audebit terminum ponere ejus admirandis operacionibus? Ideo à viris Theodidactis horum sublimium mysteriorum explicatio petenda est, quibus Deus, mirabilis in Sanctis suis, incerta et occulta sapientiæ suæ manifestavit.

Richardus Victorinus (1) sex genera contemplationis enumerat, quæ doctè, copiosè, et eleganter explanat toto opere de gratiâ Contemplationis. Primum, inquit, est in imaginatione, secundūm solam imaginationem. Secundūm in imaginatione, secundūm rationem. Tertium in ratione, secundūm imaginationem. Quartum in ratione, secundūm rationem. Quintum est suprà, sed non præter rationem. Sextum suprà rationem, et præter rationem. Duo itaque sunt in imaginatione, duo in ratione, duo in intelligentiâ. Ubi notandum, rationem distingui ab intelligentiâ, quod, qualiter intelligendum sit, infrâ explicabitur. Hos gradus aliter ordinat Auctor libri de spiritu et anima, et post eum Seraphicus Bonaventura (2).

D. Thomas (3) secutus Dionysium (4) tres gradus contemplationis distinguit juxta triplicem differentiam motū localis, circularis scilicet, recti, et obliqui. Anima enim quasi circulariter movetur contemplando sensibilia, et ex his ad seipsum perveniendo. Movetur rectè, ascendendo à se ad substantiam separatam. Obliquè cùm ad divinam veritatem contemplandam elevatur.

(1) Rich. I. 1. de gratia contemp. cap. 6. — (2) Bonav. itin. 3. æterni. dist. 4. art. 3. — (3) D. Thom. 2. 2. q. 180. art. 6. — (4) Dion. c. 4. de div. nominib.

Jacobus Alvarez (1) omnia complectens, quæ Sancti Patres, et viri spirituales de hâc re tradiderunt, quindecim nomina ad contemplationem pertinentia, quasi totidem ejus gradus explanat, et Sanctorum sententiis confirmat. Nomina do, explicatio apud ipsum melius legetur. Sunt autem ista : Intuitio veritatis, secessus animæ ad interiora, silentium spirituale, quies, unio, auditio loquelæ Dei, somnus spiritualis, ecstasis, raptus, Christi et Sanctorum apparitio corporalis, eorumdem apparitio imaginaria, visio intellectualis, visio Dei in caligine, admirabilis visio Dei, disjecta caligine, visio clara et intuitiva Dei, quæ licet propria sit Beatorum in cœlo, fuit tamen, ut probabiliter quidam Theologi docent, quibusdam sanctissimis viris etiam in hâc vitâ concessa.

Thomas à Jesu, Angelorum immixtus choris, tres eorum Hierarchias et cuiusque Hierarchiæ triclinem ordinem menti humanæ applicans, tres contemplantium Hierarchias in novem gradus distinctas constituit. Prima in imaginatione potissimum residet, secunda in intellectu, tertia in apice mentis. Prima à rerum sensibilium cognitione ad invisibilium contemplationem nos dicit. Primus ejus gradus in mundi hujus visibilis speculatione et admiratione consistit. Secundus Scripturæ sacræ intimos sensus profundè scrutatur. Tertius circâ Verbi incarnationem et omnia Christi mysteria occupatur ; in ipso enim sunt omnes thesauri sapientiae et scientiae Dei absconditi. Secunda Hierarchia rerum invisibilium intuitu ad superna elevat mentem, ipsumque Deum

(1) Alvarez to. 3. lib. 5. p. 5.

ut unum, et trinum intuetur. Primus gradus docet nos ad Deum ascendere per sue imaginis, animæ scilicet rationalis, contemplationem, secundum dona naturalia et gratuita, et finem ejus, qui est gloria cœlestis, ac felicitas Beatorum. Secundus relictis creaturis ipsum Deum, ejusque attributa contemplatur. Tertius transit ab unitate Dei ad sanctissimam Trinitatem. Tertia Hierarchia per negationes ad Deum assurgit, et divinam caliginem ingreditur. Primus ipsius gradus est pura contemplatio sine phantasmatum admixtione. Secundus contemplatio Dei in caligine. Tertius unio mystica cum Deo.

Victor Gelenius Trevirensis summam practicam mysticæ Theologie in duas partes digestam conscripsit, ediditque Coloniæ anno hujus sæculi quadragesimo sexto : in qua septem mysticos status accuratissime describit, per quos successivè transit anima, antequam perveniat ad culmen sanctitatis. Primus est status meditationis. Secundus aspiratio-  
nis. Tertius contemplationis modi affirmativi et ne-  
gativi. Et hi tres modo activo, humano, et naturali  
procedunt, quamvis principio supernaturali innitan-  
tur, nec careant aliquando divinis perceptioni-  
bus. Reliqui vero status ad modum operandi super-  
naturalem spectant, nec debet aliquis à Deo non  
vocatus temere ad eos transire : sunt enim hæc  
mystica et secretissima Dei dona, quæ nemo novit,  
nisi qui accipit; nec accipit, nisi qui desiderat; nec  
desiderat, nisi quem ignis Spiritus sancti inflamat.  
Est igitur quartus status privationis rigorosæ, quo  
disponitur anima ad status supernaturales, et ideò  
medius censetur esse inter status naturales, et su-

pernaturales, tanquam dispositio necessaria ad modum operandi supernaturaliter. In eo cessant discursus et conversio ad phantasmata: anima omnino expeditur, et deputatur, à modo operandi humano et naturali: spoliatur omni solatio, omnibus externis exercitiis, omni sensibili consolatione: omnes potentiae in fundo animae commorantur languentes, ac desolatae: deficit et obscuratur vivacitas intellectus: actus virtutum essentiali modo exercentur: nulla hic laetitia, sed tormentum inexplicabile. Dicant quid sit, qui experti sunt. Doctor mellifluus (1) comparat hunc statum morti spirituali, quam vocat mortem Angelorum. Rusbrochius (2) divini spiritus et nostri concertationem appellat, et quamdam desperationem: Taulerus (3) pressuram internam: Harpius (4) languorem infernalem, et divisionem animae ac spiritus: Barbansonius (5) item divisionem naturae ac spiritus: Maria Vela sanctimonialis Cisterciensis (6) terrible martyrium: B. Catharina Genuensis (7) horribile et indicibile tormentum. Joannes à Cruce (8) sub noctis obscuræ symbolo eum pingit, et purgatorio assimilat. Thomas à Jesu (9) purgatorium quoque esse dicit in via contingens. B. Angela de Fulgineo (10) maluisset in inferno esse, quæm tamē privationem sustinere, quæ in ipsa mi-

(1) Bern. ser. 52. in Cant. 6. — (2) Rusbroch. de orn. spirit. nupt. l. 2. c. 59. et seq. — (3) Tauler. ser. 1. Domin. 15. post. Pentec. — (4) Harpius l. 3. c. 18. — (5) Barbanson. semit. occult. p. 2. c. 10. et 11. — (6) Vitæ Mariæ Velæ p. 2. c. 43. — (7) Catharina Genuen. Dialogi c. 2. — (8) Joan. à Cruce passim in Ascen. mont. Carm. — (9) Th. à Jesu de orat. inf. l. 4. c. 19. — (10) Angela de Fulgin. eo vita c. 19.

rabilis fuit. Seraphica Virgo Teresia (1) quid patetur in hac pressurâ constituta, ipsa enarrat in vitâ, et scriptis suis. Alia aliorum effata prætermitto, et transeo ad alium statum. Hic est quintus, et dicitur status mysticæ unionis, quando à pressurâ rigidæ privationis respirans anima incipit reviviscere, et spe interioris perceptionis erecta lumen et amorem suscipit, in libertatem spiritus paulatim transit; et quantò amplius ascendit, tantò facilius capacitatem spiritus erigit ad superiora, donec à Deo sursum tracta perveniat ad felicissimam cum ipso unionem. Sextus est status Transformationis per donum Sapientiae, per quam intelligimus, non substantialem transformationem. Absit, ut consentiamus errori jam pridem damnato, quod quidam opinati sunt animam hominis à proprio esse desinere, et in ipsam Dei essentiam transire: sed arctissimam unionem cum summo bono, qua Mysticus divinæ consors naturæ factus modo perfectissimo, in eamdem imaginem transformatur de claritate in claritatem tanquam à Domini spiritu, ita ut in ejusmodi felicitate perfecta ratio mysticæ professionis inveniatur. Hujus Transformationis duplex est modus: unus quo ex alto ad inferiora descendere dicitur; alter, quo ab inferioribus ad superiora ascendit. *Charitas enim, ut verbis utar Sancti Bonaventuræ (2), ad superiora ascendit, ut in eis requiescat; ad inferiora tendit, ut ea ad se reducat: sursum movetur, ut illic maneat; deorsum, ut redeat.* Porrò hic anima silentii mystici quietam frui-

(1) Teresia vita c. 25. et mansione 6. c. 1. — (2) Bonav. 4. itin. ætern. dist. 5. art. 3.

tionem adipiscitur, quo usque spiritum suum supra se in alto videat. Licet enim in statu unionis supremas spiritus fruitions experiatur, nondum tamen plenam requiem et appetitus satis etatem consecuta est; quia frequenter reincidit in carentiam et cessationem unionis: in hoc autem statu nullam patitur distractionum molestiam; nullam passionum inordinationem, nullam gaudii spiritualis interruptionem. Septimus denique status est Sanctorum militantis Ecclesiae, quando anima abundantiori gratia, vita eximiâ sanctitate, dona miraculorum, aliquis gratiis, quas gratis datas vocant, à Deo illustratur. Hujus autem status ecstases, raptus, et alias mirabiles operationes revereri oportet et admirari, non æmulari.

4. Hi sunt gradus et status vitæ contemplativæ, quos, Deo auspice, majori quâ potui claritate et brevitate explicare conatus sum: a suis enim Auctoribus fusi et obscurius describuntur. Quæ verò ex præfatis divisionibus præferri debeat, non est meum diffinire. Hoc solum admoneo, quod Richardus gradus distinxit in ordine ad potentias; quarum ministerio Anima contemplatur. Angelicus doctor modum respexit operandi. Jacobus Alvarez non tam gradus recenset, quâm effectus et proprietates contemplationis. Thomas à JESU in primâ et mediâ Hierarchiâ omnia objecta complectitur, circa quæ versatur contemplatio: in tertîa modum tradit, quo anima suum primarium objectum perfectius contemplando attingere potest. Tandem Victor Genelius non gradus contemplationis, sed vitæ mysticæ et contemplativæ varios status sibi invicem

succedentes describit, methodum servans et ordinem, quo solet Anima ab infimis ad supraem per media progredi. Legimus quidem, aliquem nonnunquam extitisse, qui ab infimo statu ad supremum sine medio pertractus fuit: sed hæc privilegia singularia sunt, quæ Deus omnipotens, quando vult, operatur: quæ nec trahere in consequentiam licet, nec curiosè perscrutari. Sapientia Dei infinita est, justissima providentia, judicia ejus abyssus multa. Ali quando imperfectis gratiam contemplationis largitur, quam perfectis negat: et uni dedit quinque talenta, alii duo, alii unum. Dicam cum Augustino (1): *Nemo venit ad Deum, nisi tractus. Non traheris? ora ut traharis. Quare autem illum trahat, et illum non trahat, noli velle judicare, si non vis errare.* Si Dei beneficio ad sublimiora evectus es, custodi thesaurum tuum cum humilitate, et gratiarum actione: si relictus es in gradu inferiori, cave tepiditatem, et negligentiam; et te perfectius semper exerce in meditatione et aspirationibus; nam, ut docet Joannes Abbas apud Cassianum (2): *Melius est devotum in minoribus, quam indevolutum in majoribus professionibus inveniri.*

5. Libet autem hîc quererere, et obstupescere, unde proveniat, tam exiguum esse numerum incumbentium mysticae Theologiae et contemplationi, cùm sint tamen innumeri viri pii et religiosi, divinæ gratiæ consortes, et donis Spiritus sancti prædicti: crescitque admiratio expensa ratione habitus, qui quâ nobilior est, eò majorem confert potentiam operandi facilitatem. Cùm sit ergò in omnibus justis

(1) August. tr. 26. in Joan. — (2) Cassianus coll. 19. c. 3.

habitus sapientiae, quæ est donum Spiritus sancti, cur è tot millibus vix unus reperitur rerum divinarum contemplator? Profectò mirum est hoc, et possumus cum Propheta (1) plorare et dicere, *Via Sion lugent, eò quòd non sint, qui veniant ad solemnitatem.* Hujus rei causas subtilius indagare, majoris otii, et voluminis foret. Nonnullas breviter attingam. Calaguritanus (2), qui hoc dubium proponit, causam potissimum esse putat, non serio vitare leviores culpas, nec perennem cordis alere puritatem: si enim hæc exquireretur, in cordibus puris facilè divina cerneretur imago. Hæc ille verissimè, nam et sapientes Ethnici hanc veritatem cognoverunt. Hierocles (3) tunc hominem posse fieri divinum ait, cùm exuerit quidquid humanum est. Musonius apud Aristidem (4), *Ejice, inquit, quod est in anima mortuum, et Deum agnosces.* Plato mentem à corpore separandam asserit, ut Deo jungatur. Alii causam rejiciunt in naturalem corporis et temperamenti dispositionem, ratione cuius nonnulli ad mysticas functiones inepti sunt: nam teste Magno Gregorio (5) sunt quidam ita inquieti, ut sedere cum Maria ad pedes Christi minimè valeant. Sed ut observat sanctæ memoriae Episcopus Genevensis (6), debent, qui sunt hujusmodi, naturam vincere ope divinæ gratiæ, quæ omnibus invocantibus adest, et volenti nihil difficile. Ludovicus à Ponte (7) aliam

(1) Thren. 1, 4. — (2) Joann. à Jesu Maria myst. Theo. c. 3. — (3) Hierocles initio Carminum Pytag. — (4) Aristides 6. saecorum sermonum tom. 1. — (5) Greg. 6. moral. cap. 17. — (6) Sales de div. amore li. 12. c. 1. — (7) Ponte Ducus spirit. tr. 3. cap. 2.

assignat rationem, singularem Dei providentiam in Ecclesiæ gubernatione, in quâ diversa officia et gradus sunt. Quare debet unusquisque suam attendere vocationem, et invitantis vocem sequi, omnia removendo impedimenta. Præclarè Bernardus (1), *Omnes nobis causam deesse gratiam, sed justius forsitan ipsa sibi quæritur gratia deesse nonnullos.* Nempè res cordis est gratia devotionis ista quam quærimus, et hoc munere ipse se fraudat, qui internum ei dissimulat receptaculum exhibere.

6. Quòd si loquamur non simpliciter de contemplatione, sed de transitu à modo operandi humano et naturali, ad divinum et supernaturale; advertendum est, non nisi post longam et durissimam probationem, quam in statu privationis suprà descripto anima experitur, à Deo concedi, quâ de re mysticum admonere placuit, ne diutino labore pertinet animum desponeat, et à cœpto itinere retrocedat. Et ne videat temerè loqui, adfero exempla. Ubertinus de Casali (2) quatuordecim annis laboravit, priusquam introduci ad intimam perfectionem mereretur. S. Teresia (3) octodecim annis intollerabiles angustias passa est. S. Franciscus (4) per biennium gravissimo merore tabescet. B. Clara de Monte Falco (5) quindecim annos huic privationi impedit. B. Catharina Genuensis martyrium suum in suo dialogo ipsa describit. Altera Catharina Bononiensis (6) per quinque annos valde desolata fuit,

(1) Bern. initio serm. de triplici custodia. — (2) Ubertinus de Casali Arb. vite prolog. 1. — (3) Teresia vita sua c. 30. — (4) Chronic. Minor. p. lib. 1. c. 59. — (5) Harpius lib. 2. p. 5. collat. 3. in fine. — (6) Cathar. Bononiens. l. 7. de armis.

et à Dæmonibus exagitata. Maria Ægyptiaca (1) septemdecim annis afflita ad purum decoxit scoriam suam. B. Maria Magdalena de Pazis (2) per annos quinque, et deinde per alios sexdecim tantam ariditatem passa est, ut videretur à Deo derelicta. B. Henricus Suso (3) per decennium divinâ caruit consolatione. Balthasar Alvarez (4), vir eximiae sanctitatis è Societate Jesu, non nisi post sexdecim annos in vitâ mysticâ cum tenebris et labore decursos divinæ lucis adeptus est illustrationem. Thomas à Jesu (5) annis plusquam viginti laborans percipere non potuit, quid sit unio animæ cum Deo, donec tandem divina bonitas ei revelavit. Quod si in viridi hæc facta sunt, in arido quid fiet? Animo igitur infracto in viâ Domini perseverare oportet, et ab ejus disciplina non deficere, quia, ut ait B. Laurentius Justinianus (6), in bono occupatos non derelinquit, illosque ex insperato, et in nesciente caligine visitare consuevit. D. Bernardus (7) usque ad finem vitæ hanc spem, et patientiam extendit, sic enim ait: *Multi totâ vitâ suâ ad hoc tendunt, et nunquam pertendunt: quibus tamen, si piè, et perseveranter conati sunt, statim ut de corpore exceunt, redditur quod in hâc vitâ dispensatoriè est negatum: illuc perducente eos solâ gratiâ quo prius tendebant ipsi cum gratia, ut consummati in brevi, expleant tempora multa.*

(1) In vitiis Patrum l. 1. — (2) In vita ipsius. — (3) Heur. Suso vita sua cap. 23. et 32. — (4) Lud. à Ponte in vita Balth. Alvar. c. 2. et 13. — (5) Th. à Jesu in præf. lib. de orat. infusa. — (6) Laur. Justinianus de triumphali Christi agone cap. 17. — (7) Bern. ser. 3. de Circumsis.

7. Desino, si prius explicavero, quod ante promisi, animæ scilicet et potentiarum ejus divisionem secundum Mysticos. Marius Victorinus Afer (1) duas distinguit animas in homine, duas mentes, duplificem rationem, cœlestem et hylicam. Constat enim homo duplice natura corporali et spirituali, et ideo duplices debet habere operationes, corporales et spirituales; quarum ordinem et directionem in proprium finem respicientes Mysticci hominem animalem et spiritualem distinguunt, non per substantiam, sed per meriti qualitatem, ut loquitur Paulinus Aquiliensis (2). Animæ autem vires sive potentias in Ordine ad contemplationem sex esse statuit Seraphicus Bonaventura (3), nempe sensum, imaginationem, rationem, intellectum, intelligentiam, et apicem mentis, sive synderesis scintillam. Afferunt quidem Philosophi, rationem, intellectum, et intelligentiam non esse diversas potentias, non tamen negant esse diversos actus, sive gradus intellectus. Nam vis intellectiva, in quantum est discursiva, dicitur ratio: in quantum est simpliciter intuitiva, dicitur intellectus: in quantum est Divinitatis contemplativa per simplicem apprehensionem, dicitur intelligentia, quod optimè Richardus (4) observat. Synderesis vero, quæ est habitus rationis practicæ animæ concreta, quo prima principia in operabilibus natura-liter cognoscit, merito à Mysticis apex mentis nuncupatur, et scintilla rationis sive intelligentiæ, quia

(1) Mar. Victor. in fi. lib. 1. adv. Arium. — (2) Paulinus Aquiliensis in libello adv. Felicem Urgelitanum, et Elipantum Tolosanum episcopos. — (3) Bonav. itinerar. mentis in Deum c. 1. — (4) Richard. 1. de Contempl. c. 9.

per eam sortitur anima quemdam respectum ad Deum immediatum, quo capax est ab ipso immediatè tangi et irradiari : et quia semper nata est in superioribus figi, et ad divina elevari : illustratque animam splendore cognitionis, et ardore inclinationis ad bonum eam succedit. Hæc ad mentem Bonaventuræ. Alii aliter procedunt. Animam vocant secundūm operationes partis sensitivæ et appetitivæ : spiritum quoad vires rationales. Mens vel apex spiritus est nudus ac Deiformis animæ fundus, id est simplex animæ essentia imagine Dei insig-  
nita. Per fundum autem intelligo animæ nostræ *higemonicum*, seu principem partem, ut voce utar Stoicorum, aliter tamen quàm ipsi intelligent. Con-  
cipio enim animam tanquam vas quoddam lucidum, capax omnium illuminationum, et umbrarum à re-  
bus quibusunque provenientium. Sicut autem infi-  
num vasis fundus vocatur, omnia superinfusa sus-  
tentans ac retinens : ita princeps nostri pars, seu  
apex mentis idem sortitur nomen. Et sicut fundus  
eò magis absconditur, quò magis repletur corpori-  
bus densis : ita anima eò minus divinam percipit  
irradiationem, quò crassiores species rerum terrena-  
rum Dei illustrationi superinfundit. Cunctis verò  
imaginibus creaturarum evacuatis, simplex dum-  
taxat, et amabilis Dei vultus in fundo animæappa-  
rebit. De hoc fundo plura Taulerus, et alii Mystici  
passim. Ejus quoque mentionem facit S. Diadochus  
Photicensis Episcopus (1), qui vixisse creditur circà  
finem quarti saeculi, quod notare volui, ne quis hanc  
vocem novitatis incuset.

(1) Diadoc. de perfect. c. 26. et 28.

8. Quoniam autem huc perveni, et hanc brevem, Isagogem mysticæ Theologiæ, Deo duce, conscripsi ; jam ad praxim Aspirationum descendendum est, si priùs hymnum cecinero, quo et gratias prime omnium causæ agam, et vires postulem ad ea quæ desunt perficienda.

O fons decori luminis (1),  
O lux serena siderum,  
Ignis Deus purissime,  
Vigor pereani cordium.  
Te voce semper, te prece,  
Te mente grata, vindicem  
Mea salutis concinnam,  
A Sole Eoo ad Hesperum.  
Tu spes mihi, tu primum,  
Tu portus es fiducia?  
Te fretus uno pertuli  
Sortis procellam turbidæ.  
Inter labores asperos  
Lumen tua clementiæ,  
Repente fulgens, vim procul  
Abesse jussit Tartari.  
Salve supernum incendium,  
Clarumque mentum jubar :  
Ad te revertor, supplicem  
Voca per ignes mysticos.  
Descende flamma, illabere  
Celorum ab aere fulgida,  
Infunde cæco pectori  
De fonte lucis lumina.  
Cor, ossa, fibras concrema,  
Venas, medullas, viscera,  
Ipsamque mentem, ac spiritum,  
Ut totus ardeam tibi.  
O sors beata, ô gaudium,  
Conjuncta cùm mens Numini,

(1) Ex libello meorum Carminum nondum impresso.

Et immemor rerum omnium,  
Te diligit perenniter.  
Summo Parenti Cœlitum,  
Natoque, et almo Flamini  
Sit laus, decusque perpetuum  
Nunc et per omne sæculum.

## CAPUT XI.

GEMITUS ANIMÆ POENITENTIS PRO INCIPIENTIBUS.

Quamvis expertis difficile non sit, propriis motibus ad Deum assurgere, possitque unusquisque ex pharetrâ sui cordis sagittas orationum depromere; ne his tamen deficientibus pius Asceta aridus reperiatur, defectuve lignorum mysticus ignis in arâ cordis extinguitur: ex Scriptura et Sanctis Patribus sylvulam Aspirationum collegi, pro triplici statu Incipientium, Proficientium, et Perfectorum; in quarum usu et praxi quid servandum sit, jam suprà explicatum est. Habes hic eas in varias decades distributas, quo facilius valeant memoriae mandari: cui studio aliquot dies tribuendi sunt. Quid enim prodest multas Aspirationes in libello descriptas habere, nisi etiam memoriae inscriptæ, imò et insculptæ sint, ut in promptu habeantur omni horâ, et momento? Propono autem primo loco gemitus animæ poenitentis, naturæ, et doctrinæ ordinem sequutus: quia, ut perveniamus ad id quod nondum sumus, purgare primò id quod sumus, et lacrymis eluere debemus.

## DECAS I.

1. Domine Deus meus, ego vilissimus sum peccator; indignus planè, quem terra sustineat. Misere mei, et salva me.

2. Domine, qui es summum bonum meum, quām longē per peccatum recessi à te, et habito in regione hâc longinquâ misericarum, ubi perdidì me.

3. Pater amantissime, peccavi in cœlum et coram te, verè non sum dignus vocari filius tuus, fac me obsecro sicut unum de mercenariis tuis.

4. O quām poenitet me peccasse, dulcissime Deus, quām poenitet me, quòd legem tuam transgressus sum: amplius lava me ab iniquitate meâ, et à peccato meo munda me.

5. Domine Deus meus, detestor peccata mea, abominor universa flagitia mea, confiteor ingratitudinem meam, et confugio ad aram misericordiae tuæ.

6. Ablue me, Christe Jesu, pretioso sanguine tuo, et munda me ab omni peccato.

7. Sana, Domine, animam meam peccatis vulneratam, unge oleo gratiæ tuæ cicatrices delictorum meorum, ne quæso despicas me.

8. Domine Deus piissime, ab hâc horâ nunquam transgrediar legem tuam, nunquam amplius consentire volo in aliquod peccatum: malo incurrire omnem poenam, omnem infamiam, atque ipsam mortem, quām deinceps peccare.

9. O Pater amantissime, da mihi ut faciam fructus dignos poenitentiæ, et puniam delicta mea debitâ castigatione.